

荷衣松食

唐，大梅常禪師，得馬大師即心即佛之旨；隱深山中，人無知者。鹽官以書招之，辭不赴，附以偈云：「一池荷葉衣無盡，數樹松花食有餘；剛被世人知住處，又移茅舍入深居。」

鹿鳥為侶

後周，行因，隱居廬山佛手巖。每夜闌，一鹿一雉棲遲石屋之側，馴狎如伴侶，殊無疑怖。因平生不畜弟子，有鄰庵僧為之給侍。一日謂曰：「捲上簾，吾欲去！」簾方就鉤，因下床行數步，屹然立化。

贊曰：多欲之人，死且彌切，甚而分香賣履，眷眷不能放下。不獨世諦中人，釋子亦有之。因一生清氣逼人，脫化如遊戲，不亦宜乎？